

Sarajevska pivara: Svježim kapitalom do prodaje milion hektolitara piva godišnje

Autor/izvor: SEEbiz / indikator.ba
Datum objave: 06.09.2016. - 20:27:13

SARAJEVO - Zainteresovani investitori od 20. septembra moći će [kupovati](#) dionice Sarajevske pivare d.d. Sarajevo i tako steći vlasnički udio u kompaniji.

Sarajevska pivara putem javne ponude emituje 652.174 redovnih (običnih) dionica nominalne vrijednosti po dionici 23,00 KM. Ukupna vrijednost emisije je 15 miliona KM, a što će u strukturi kapitala činiti 23,65 posto.

Upis i uplata dionica će se vršiti kod banke depozitara **Sberbank** BH d.d. Sarajevo do 20.10 2016.godine. Ponuda će biti uspješna ako bude kupljeno minimalno 60% od ukupno ponuđenog broja dionica.

Otvaranjem prema investitorima, Sarajevska pivara želi osnažiti planove da godišnje proizvede i plasira na tržište milion hl piva i milion hl bezalkoholnih osvježavajućih napitaka. Plan prodaje za 2016. godinu je 353.249 hl piva, što predstavlja porast od 32 posto u odnosu na 2015. godinu.

Preduslovi za ovo povećanje su ispunjeni tokom prošle i ove godine pri čemu je važan korak početak proizvodnje licenciranog Oettinger Pilsa i Oettinger pšeničnog piva.

Ključne tačke plana za 2016. godinu, a koji bi trebao služiti kao podloga za ostvarivanje prodaje od 500 hiljada hl u 2017. godini uključuju unaprijeđeni kvalitet proizvoda, veći budžet za marketing, proširenje proizvodnog portfolija, intenzivan rad na izvoznim tržištima, imlementaciju [novog](#) infomacionog sistema te promjenu u načinu prodaje i distribucije.

Inače, Sarajevska pivara ima tržišno učešće u BiH od 8,3 posto.

U prospektu za javnu ponudu dionica navode se i rizici za investitore koji žele uložiti u društvo, a najveći su finansijske obaveze od 137,5 mil. KM zaključno sa 31. 12. 2015. godine, od čega najveći dio otpada na uzete kredite 102,6 miliona KM.

Najava javne [ponude](#) prije otprilike mjesec i po bila je razlog za veliki skok vrijednosti dionica Sarajevske pivare, pa je tako kurs za kratko vrijeme porastao sa 3,03 KM na čak 22,78 KM 2. avgusta. Zbog toga je trgovina [dionicama](#) kompanije jedno vrijeme bila obustavljena.

Posljednja cijena (8.8.2016. godine) bila je 18,71 KM, a dionice Sarajevske pivare u međuvremenu, radi veće transparentnosti i privlačnosti za investitore, uvrštene su na Kotaciju Sarajevske berze.

Sarajevska pivara je u većinskom vlasništvu Hilme Selimovića 69,11 posto i MIMS-a doo 9,90 posto.